

Valprogram - Osterøy Senterparti 2019 - 2023

Etter valet vil Osterøy Senterparti ta kontakt med dei andre partia i heradsstyret for å danna eit styringsdyktig fleirtal til å styra kommunen dei neste fire åra. Her vil me aktivt søkja makt og støtta det fleirtalet som gjev oss mest gjennomslag for våre saker.

Tre hovudsaker:

Kommunereform

I inneverande valperiode har Osterøy Senterparti vore den klåraste røysta mot ei samanslåing med Bergen kommune. Det vil me også vera i komande periode. Osterøy kommune med sine 8000 innbyggjarar er stor nok til å halda fram som eigen kommune. Dersom det kjem forslag om endringar av kommunestruktur, vil Senterpartiet krevja at det vert folkerøysting før det vert gjort vedtak i heradsstyret. Osterøy Senterparti vil følgja resultatet av ei folkerøysting.

Matjord

Landbruket er ei viktig næring for Osterøy. Osterøy Senterparti vil kjempa for minst mogleg nedbygging av dyrka jord, og jord som er eigna for nydyrking. Dette vil Senterpartiet gjera ved å innføra strenge retningsliner for planavdelinga i kommunen, og krav om flytting av matjord og nydyrking der utbygging på matjord er uunngåeleg. Eit aktivt landbruk er avgjerande for å vedlikehalda det vakre kulturlandskapet Osterøy er kjend for.

Menneskeslekta har berre eit tynt lag med jord mellom seg og hungersnauda.
(The Bart of Cincinnati)

Gode lokalsamfunn

Osterøy Senterparti vil leggja til rette for at det skal vera busetnad, viktige tenester og gode fritidstilbod i alle bygder på Osterøy. Senterpartiet vil arbeida for at mest mogleg av bustadbygginga skal skje i regulerte felt, men vil òg arbeida for at det skal vera opning for spreidd bustadbygging i bygdene når utbygging ikkje lagar vanskar for andre interesser.

Andre saker:

Det skal vera lys i vindauga hjå naboen

I 2015 avvikla Osterøy kommune buplikta. Fire år seinare ser me at dette er negativt for busetjinga i kommunen. Det er dei som ynskjer å bu og leva her i kommunen som skal ha førsterett når bustadhus vert lagde ut for sal. Difor ynskjer Osterøy Senterparti å innføra buplikta på nytt for alle bustadhus i Osterøy kommune.

Økonomi og eigedomsskatt

Osterøy Senterparti står for ein nøktern og ansvarleg økonomisk politikk. Senterpartiet ynskjer ikkje å kutta i det offentlege velferdstilbodet eller å privatisera delar av omsorgssektoren. Osterøy Senterparti meiner at interkommunalt samarbeid er aktuelt for enkelte kommunale arbeidsoppgåver både for å betra økonomien og for å skaffa større fagkunnskap.

Grunna kutt i overføringar er økonomien i kommunen pressa. Senterpartiet er ikkje tilhengjar av kommunal eigedomsskatt, men på grunn av stadig reduserte overføringar frå staten kan ikkje Osterøy Senterparti lova å fjerna eigedomsskatten i valperioden.

Det som bind oss saman

Alle reisande i kommunen, anten dei reiser kollektivt eller privat, skal koma trygt fram til skule, arbeid og andre stader. Grunna meir ekstremvêr og aukande vedlikehaldsetterslep på vegane, kan det verta meir utfordrande å ferdast trygt rundt om i kommunen. Osterøy Senterparti vil difor prioritera å arbeida for rassikring og utbetring av trafikkfarlege strekningar framfor nye veganlegg.

Verdiskaping på heile Osterøy

Osterøy er kjend for den unike industrien vår med mange små og mellomstore bedrifter. Bedriftene er viktige for sysselsetjinga i kommunen. Senterpartiet vil arbeida for gode vilkår for eksisterande industri og leggja til rette for etablering av nye bedrifter. Kommunen må vera pådrivar for å få fleire lærlingplassar i kommunen,

Auka turisme til Osterøy vil gje grobotn for nytt næringsliv, og styrkja det eksisterande. Dette vil gje nye arbeidsplassar og inntekter til kommunen. Osterøy Senterparti ynskjer at kommunen skal vera ein bidragsytar for utvikling av reiselivet.

Helse og omsorg

Alle skal ha ein verdig alderdom. Dagens tilbod på Osterøytunet er godt, og skal halda fram. Samstundes ynskjer Osterøy Senterparti å satsa meir på å gje eit fullgodt tilbod utan at ein må flytta på institusjon. Ei større satsing på tilrettelagde bustader med velferdsteknologi vil gje dei eldre moglegheit til, og gleda av, å klara seg sjølve endå lenger.

God mat er god omsorg, og difor ynskjer Osterøy Senterparti å vidareføra matlaginga på Osterøytunet. Dette med tanke på mat til bebruarane, men òg på levering til innbyggjarar som treng dette.

Osterøy Senterparti vil gjera det me kan for at alle skal ha eit godt støtteapparat i kommunen uansett kva type vanskar og utfordringar ein opplever. Ein skal få like god hjelp både ved fysisk og psykisk sjukdom, og ved utfordringar knytt til rus og avhengnad.

Klima og miljø

Skal me nå 2-gradersmålet, og avgrensa skadeomfanget av dei menneskeskapte klimaendringane, må alle bidra. Dette gjeld heilt frå internasjonalt nivå og ned til kvar einskild av oss. Osterøy Senterparti ynskjer difor at kommunen skal vera ein aktiv bidragsytar og førebilete for klimavenlege val. I tillegg vil me at kommunen skal leggja til rette for at det skal vera enklare å ta klimasmarte val i framtida.

Senterpartiet vil arbeida for at fiskeoppdretta i framtida vert i utsleppsfrie anlegg for å redusera avtrykket på miljøet.

Oppvekst

Barnehagane skal medverka til ein meningsfull oppvekst for barn på Osterøy. Osterøy Senterparti vil satsa på auka kompetanse til dei tilsette, styrkja bemanninga i barnehagane, ha faste vikarar, og styrkja barnehagane som fysiske anlegg. Osterøy Senterparti ynskjer at det skal vera eit kontinuerleg opptak til barnehagane.

Alle elevar på Osterøy har rett til å få tilpassa undervisning ut frå sine eigne føresetnadar. Det er viktig at skulen gjev trivsel og tryggleik for å gje dei gode føresetnadar for å læra.

Osterøy Senterparti vil arbeida for å innføra eit sunt skulemåltid for elevar i grunnskulen, gjerne i samarbeid med heimen. Blandinga av kommunale og private grunnskular gjev i dag eit godt tilbod til born på Osterøy, og dette tilbodet vil me skal halda fram.

Kultur og fritid

Frivillig arbeid er særskild viktig for å halda oppe eit rikt kultur- og fritidstilbod i alle delar av kommunen. Senterpartiet ynskjer å støtta det frivillige arbeidet i samfunnet, og vil arbeida for å få inn tilskot til lags- og kulturarbeid. Senterpartiet vil arbeida for at det vert lagt til rette for varierte fritidstilbod. I tillegg må lag og organisasjonar framleis få bruka skulane gratis til øving og tilstellingar.

Osterøy Senterparti ynskjer å bevare kyrkjene i kommunen, då dei er viktige kulturelle og religiøse møtepunkt.

Arbeidet med kulturminneplan bør halda fram.

Verdien av arbeidet i grendaråda er viktig, og dette er noko som bør halda fram.

Integrering

Osterøy har gode vilkår for integrering av flyktningar og asylsøkjjarar. Om me skal lukkast med dette arbeidet er me avhengige av at alle gjer ein innsats. Osterøy Senterparti meiner det er viktig at kommunen ser på kapasiteten i integreringsarbeidet før ein tek stilling til kor mange me skal ta i mot. På denne måten er ein sikker på at

dei som kjem til kommunen som flyktningar og asylsøkjjarar får eit godt tilbod og vert sjølvstendige innbyggjarar så fort som mogleg. God språkopplæring er grunnleggjande. Dette er viktig for livskvaliteten til dei som kjem her for å starta eit nytt liv.